

■ TRIBUNA POLITICA

Iniziativa da cotgla

Ina tematica explosiva cun consequenzas gravantas per il Grischun

DA HEINZ BRAND,
CUSSEGLIER NAZIUNAL

En la concorrenza interchantunala ed internaziunala regia in vent criv. Perquai èsi impurtant ch'il Grischun sco piazza economica porschia bunas cundiziuns da basa a sias interpresas. Sulettamain uschia pudain nus mantegnair numerusas plazzas da lavur en noss chantun. Enfin oz è il Grischun sa dustà vaira bain. Ma quai pudess ussa sa midar! Cun in'iniziativa inutila pericliteschan organisaziuns per la protecziun da l'ambient la buna reputaziun dal chantun e mettan nunponderadamain en privel las bunas cundiziuns da basa. Quest agir indesblescha il Grischun sco piazza economica.

In'iniziativa cun consequenzas fatalas

In'iniziativa sut il titel bagatellisant «Gea ad electricitad netta senza ovras da charvun» pretenda numnadamain che l'interpresa d'energia grischuna Repower sa retiria d'in project d'ina ovra da charvun en l'Italia dal sid. Cumbain che la regenza taliana ha approvà il project che ademplescha a moda exemplarica tut las prescripziuns ecologicas e sanitaras legalas è il project ina spina en ils eglis da protecturs da l'ambient dal Grischun radicals. Per impedir l'ovra en l'Italia pretendan ils activists per la protecziun da l'ambient schizunt in scumond general per forza electrica da charvun. Quest



scumond vulan els francar en la constituiziun chantunala. Ultra da quai duai quest scumond valair a moda retroactiva.

Ils iniziants na s'empatschan betg dal donn

L'iniziativa formulada a moda bagatellisanta «Gea ad electricitad netta senza ovras da charvun» è en realitad ina veritabla chargia explosiva per il Grischun! Tge consequenzas che quella ha para dentant dad esser tuttina als activists per la protecziun da l'ambient!

La Repower stuess en consequenza scriver giu in import da plirs milliuns francs. Periclitadas fissan surtut era 120 plazzas da lavur en noss chantun. Ultra da quai perdess la Repower en l'Italia sia reputaziun sco furnitura d'energia ed investidra fidada. Cunquei che la Repower fa la mesadad da la svieuta e dal gudogn annual en l'Italia avess quai era consequenzas negativas per il Grischun. Ils activists per

la protecziun da l'ambient na sa laschan era betg starmentar dal ristg ch'il chantun Grischun stuess sco pli impurtant acziunari da l'interpresa vender sias participaziuns. Gist uschè pauc sco dal fatg ch'il chantun perdess «sia» interpresa d'energia a concerns d'energia da la Bassa, ils quals cumandassan en l'avegnir las festas.

La segirezza dal dretg e d'investiziuns è periclitada

Isa mussa però er anc en in auter regard che l'iniziativa è da vaira stretg orizont. Sche interpresas grischunas sco la Repower ston quintar che la politica las po far prescripziuns – schizunt a moda retroactiva – e sa maschadar en l'afar operativ, ha quai in effect alarmant. Sche la segirezza dal dretg e d'investiziuns per interpresas grischunas po en quella moda simplamain vegnir messa ord funcziun e reglas da gieu valaivlas perdan lur vigur vegn mintga interpresa grischuna a ponderar duas giadas schebain ella duai in summa anc investir. Tge che quai signifitga per il commerzi local e per las plazzas da lavur grischunas po mintgin s'imaginar!

Quai èn nauschas vistas per il Grischun. La buna nova è però che nus pudain impedir tut quai ils 22 da settember 2013: cun in ferm NA cunter l'iniziativa fatala ed in GEA a la cuntraproposta moderada che impedescha consequenzas gravantas.